

2847651

42

11



乾隆九年春鑄

張六湖先生

遺集

孝友堂
藏板

古之為吏文章與政事無相妨也牒訴僅僇日盈於前而嘯志歌懷不損其趣何哉才足以兼之性復不移於所樂其從容出之而有以皆得固其宜也近世仕宦者不然方縮尺綬坐曹紛紜畫治文符或繼夜燭於是短檠棄乎墻角研匣封乎暗塵一詠一吟恐廢官務徃徃休息而宣城蘇州香山玉局之風流雅韻始無復有繼之者矣獨蕭然張君六湖起儒生佐大郡職事甚治而以其餘閒時昔賦詩雕鍊篇章清和密麗未常以官自局也青州地廣人衆故其舊俗有懷甄之目君為同知能




得要領政以簡靜予素知君才良歲己酉庚戌予有事

闕里適君亦來司營構周旋朝夕偕得甚驩凡所為詩觀覽略徧歎其一本性情非猶夫世之銜華逞巧自詡工妙者乾隆初予被

召貳御史大夫君上計京師謁予邸中握手道疇昔流連談話久不能別未幾而君去去無何而聞君卒矣惜良友之奄亡感通人之零落徘徊俯仰愴在中懷後數年君有子學懋編綴遺集鋟梨既成以君與予生平之好屬序其書披卷未終再三

興喟鄰人之笛恍忽山陽孟亭之文空留江漢若夫君在青州尤有惠政人至今能道之是其可以不沒者又豈獨在於詩乎乾隆乙丑春王三月下浣年家眷弟海寧陳世倌拜撰



蕭山張六湖司馬風雅恬澹君子也予向耳其名
慕其人而終以不得一見丰采為憾乾隆乙丑春
三月司馬嗣君佳山游日下手司馬遺集謁予屬
予序予讀司馬之詩益以嘆司馬之為人實晚近
所不可及也司馬稟受異質胚胎前光年甫冠鍵
關汲古有聲藝苑暇即學為嚴詩出句輒驚里中
老宿及壯隨侍北平耳濡目染學殖日益厚所交
皆當世賢豪互相劇切名譽亦隆隆日起方自負
取科第直如摘頷下髭耳無何數竒屢躋場屋嗟
乎以安世之學窮三篋而坐賦四愁僅同平子其

為轅軻抑鬱不待發為歌詩予早有以知其聲之
淒且激矣既而隨例謁選司馬青州清端敏練政
甲二東廼復與時枘鑿十年不調青衫蕉萃白髮
刁騷視事則簿領紛煩行役則山川遐阻憂從中
來誰能遣此而司馬遇物流連臨風吟嘯一一托
諸長篇短什巨寫其夷猶冲澹之致不事瑣肝琢
腎而一徃清雋不減香山嗟乎讀司馬之詩即可
以知司馬之為人矣他日司馬解組歸里頤養天
和予方期一遂初衣訪司馬於西陵江寺間相羊
文酒以罄生平願見之歡今已矣神理茫茫黃壚
誌感此予之所以讀六湖遺集而盡然也佳山抱
茲遺集思續先業司馬可謂有子矣佳山可謂能
讀父書矣會稽學弟周長發拜序



嗟乎予讀六湖先生遺集而慨然也念六湖平生
有白傅青衫之恨而老大蛾眉同一淪落能無振
觸於懷六湖少負俊聲偕里中名士聯詩社推為
職志隨侍尊甫永平公宦遊燕南出交當世聞見
日益廣意氣轉上既數踏省門不中第隨例作選
人又旅食京華發為詩歌多掩抑摧藏間亦自寓
詼嘲中年得青州司馬非其好也予以雍正丙午
冬出守兗郡濟上行省都會歲四三聚如趵泉歷
亭同官讌集於斯多喜道日下近聞或舉大憲云
云若何監司云云若何六湖獨與予談藝護謫絮

六湖先生遺集 序
一
沓不能自休諸公相與目笑之六湖軒昂自若未
幾而有闕里之役於時晨夕過從惟六湖與予及
東阿令西軒何君耳官司匠石麋至岔集夫已氏
乘機鬪捷般輸之不務顧乃日奏偃師之伎此三
年中予與六湖看盡魚龍戲齒冷人間非一事矣
工竣星散不相聞問者八年乾隆丁巳予客遊濟
上六湖適以公事至相見問無恙外繼以三歎六
湖謂予君且迴軫我行誓墓兩人其沮溺流乎予
曰君之齒未也今方伯江夏先生甚才君盍少俟
之蓋六湖吏事精敏遇振災卹患草行爰舍不遑

寧又所至講求水利鏡其源流方東省議開小清
河也六湖奏記方伯指挾利病時議者力主濬深
支脈溝且隄防以拯高博樂三邑泛濫六湖獨建
言請停支脈溝隄工移畚鍤於乾河用復小清河
故道仍存軍張閘以殺其上流別開倉頭溝以分
其去路皆切中肯綮會有尼之者不盡如君筴一
官蹉跎亦竟十年不調嗟乎今之所謂竿頭進步
大抵如火如花而我六湖滄滄涼涼視彼望塵如
避赫曦王沈有言得爐冶之門者惟挾炭之子冰
氏子守其故我其與時杈枒也固宜自古感士不

遇騷人具有賦心而迂生劉晝且從而作高才不
遇傳獨今人也哉獨六湖一人也哉六湖所為詩
甚夥嗣君佳山哀集其全令予論次予稍為淘汰
擇其尤雅君詩發抒性靈流露天葩道得眼前景
慝心溢目妙處何減長慶老人然亦未嘗倚傍門
戶其胷中一段輪囷鬱律之氣要自不可磨滅予
投老鑑曲距蕭然山下烏篷白舫一昔可至方將
遲君作山澤遊蓋耦畊之言猶在耳也而六湖亟
作古人矣泫然書以歸之乾隆八年桐始華之月
同學寅弟山陰金以成



六湖張司馬老先生尚書華閬刺史清門素有才
子之名蚤著通人之目玉池清水灌其靈根仙露
明霞方其朗潤謀心思於神講出睿慮於夙成揚
手文飛似巖花之錯映揮毫霧捲儼江月之澄鮮
宜其名擅騷壇號稱詩伯者矣僕生而同里齒亦
肩隨殊乏銜盃接鄰之歡曾無擊鉢聯吟之雅雖
英辭妙句徃徃傳聞而積卷全編寥寥寓目所以
然者良有說焉蓋老先生以神仙之姿早一麾而
出守僕則蓬茅之子垂沒齒而無聞升沉之路既
殊會合之緣自少然而鄭吳縞帶托遠契於萍踪

郭李仙舟結遙情於塵表譬雲龍之相逐實嚶鳴
之是求及不佞謬應詞科待詔金馬門前適老先
生驅馳王事相遇蒼龍闕下依稀舊識樂莫新知
當此之時爍鉛刀於歐冶之爐幾忘鈍拙廁嫫母
於陽文之側自醜形容未幾而南嶽獻嘲同退飛
之鷓鴣台星中坻傷凋謝之哲人嗣宗臨岐路而
悲哀濬冲過酒壚而慟哭僕本恨人誰能遣此也
哉今佳山兄思表前徽俾予作序諦觀往製行行
入羣玉之林縱覽遺編字字浴投金之瀨驅穢濁
而餐沆瀣棄糟粕而漱醇醪意蓋經營無取乎剪

紅刻翠辭條茂密有異於擘柳吹花規橰在李杜
之間位置入元和之室至於筆分三品書載五車
藏著作於名山燭英華於南斗敬附數語敢云皇
甫之序太冲藉是而傳略綴片言亦如遐叔之於
騎曹情弗能禁同里周琰青瑤氏頓首拜撰



六湖先生遺集

較閱姓氏

文安井其洵眉一

文安陳鳳友鶴汀

盧氏王爾鑑熊峯

郟陽雷 豫介石

安化姚仁昌來裕

文安井玉樞丹文

來安周克龍雲際

曲阜顏懋倫樂清

錢塘聞人儒軼宋

歸安潘汝誠笠庭

錢塘沈 范厚田

海寧陳景星健雲

樂清薛 英雪堂

山陰胡仁濟沛施

山陰金 磐安亭

會稽王繩武載揚

上虞徐 軾長蘇 會稽童翼鵬南九

同邑來景風萬嘉 周濂文恭先

黃 雲天繪 吳元禮經百

趙 鎬豐來 林 霖潤斧

周 琰西序 李開嵯迥亭

孫有仁克三 周作梅予良

陸 炆素伯 陳師亮葵友

丁百川學海 宗姪 若天叙潢

蔡成賢公傳 鼎載銘

王 淇瞻筠

六湖先生遺集目錄

卷一

亦南軒近稿古今體詩七十八首

卷二

因心齋近稿古今體詩六十三首

卷三

淺綠山房稿古今體詩六十一首

卷四

當歸小草古今體詩五十七首

卷五

孤雲集古今體詩二十三首

嶺南游戲集古今體詩四十七首

卷六

歸厚莊稿古今體詩三十四首

北游藁古今體詩三十二首

卷七

松雲草堂稿古今體詩三十首

北至集古今體詩二十五首

卷八

來青集古今體詩二十八首

曲阜集古今體詩三十五首

卷九

曲阜二集古今體詩十首

西笑集古今體詩四十五首

卷十

再來青集古今體詩六十六首

卷十一

來青三集古今體詩五十首

卷十二

鳳眼亭稿古今體詩四十二首

胞與堂稿今體詩一十六首

六湖先生遺集目錄

六湖先生遺集卷之一

蕭山 張文瑞雲表 著

亦南軒近稿

讀揚子十三首 并序



東坡和淵明山海經十三首皆賦也余讀子雲書有所感發遂踵其韻

勺水生波瀾寸木生扶疎好德不斧藻樂道處窮廬先師鑄人術惟此數卷書諸儒苦辭勝撫華盈五車譬如食肉者孰若甘藿蔬有玉匪錯諸賤與瓦石俱速哉七十子遷善成令圖所以揚子雲草

玄心泊如

馬晞驥亦驥人晞顏亦顏讀書如好色好色當少年望道如望遠望遠須高山常羞有至味可與知音言

鳳鳥不復至舉世寡聖邱冥行脫緩手安得鷄也
儔華丹亂窈窕邪哆侈名流卓哉子雲語禽門莫浪遊

嗟嗟揚子雲生當漢斜陽孤負經濟才命薄筆舌長文字燭千古火用而彌光柰何親見之肉眼迷驪黃

予懷吳延陵遜國心可憐復憶鄭子真谷口耕窮山存神索處眇潛德貴無言學士不聞道何論彭殤年

南山有黃鳥迴翔集喬木風雨苦為巢雙飛出幽谷朝衙闥苑花暮就瑤池浴雖無鳳凰德保身明智燭

九鼎非所寶古人惜寸陰今人繡鞞悅眯目為儒林靡靡調鄭衛簫韶無賞音安得屏華藻浩然澄素心

冬日疾於駛夏日舒以長士大愛光景聆德存天

常仁義為盛饌六藝為餘糧庶幾顏氏子簞瓢樂未央

風雷一鼓舞羣動爭奔走為政苟日新子來將襁負穀人晝不足絲人夜何有受羊求牧芻曷忍鞭其後

秦楚漢之際血國如沸海表裏皆劔立孤睽失所在斧刀而木肉祖龍得無悔終以與沛公天心蓋有待

揚子惡鄉訕頗得先師旨孰謂賜也較好貨幾誤死西南徃得朋考祥視素履所以天資高可畏不

可恃

子長多好奇所謂豪傑士史記炳丹青經營亦勤止後來珥筆者巫學禹步耳苟取巫鼓為何世無才子

孝子能愛日何論才不才祿養倘非義曾弗如嗟來除無為名心詎慮生嫌猜陔華可以補庶幾優游哉

燕角店口占

歸路香河北微涼燕角秋野舟叢晚渡孤月上新愁

九月三日自遼西郡還家省墓留別井字
寅羅慎調姚時鹿徐白山胡沛施沈維城
任自山諸世長二首

秋水愁雲處處同
虎頭渡口又西風
此行不為鱸魚膾
猶及家山未掃松

惜別南邱酒數杯
還鄉河上更徘徊
渡淮漸與家鄉近
越水吳山次第來

次琉璃河

無風無雨近重陽
蕭瑟離亭柳葉黃
試問琉璃橋下路
隔河州里是樓桑

琉璃河曉行

料峭西風取次寒
五更扶夢上征鞍
乘乾月色西山影
雙照離人淚眼看

鄭州

趙北燕南路渺茫
芙蓉秋水颭寒塘
尋思憂患無頭緒
獨向琳宮拜梵王

任邱家君魯宰是邑

落日征途屢問人
甘棠樹裏暗前津
舊遊曾是兒童歲
二十年來記不真

平原旅次題壁

黃金臺下無竒策羅刹江頭有故園我亦從來感
知己欲披風雪弔平原

沂州

歸路蕭條黃葉風鞭絲帽影夕陽中三齊山水多
竒秀看到江南又不同

郊城

傾蓋亭邊日欲斜落霞紅樹映溪沙人間那有閒
於我一路吟詩直到家

落馬湖邊作

湖水湖煙澹沲秋草風莎雨亂羈愁幾聲落雁平

沙暮憶上漁陽舊酒樓

淮南米賤及南游楓葉蘆花滿目秋明日且辭湖
上路更攜詩卷上扁舟

經桃源越店自和戊子春題壁韻示內

馬首南來路渺漫羈愁暫借一枝安明朝小得扁
舟趣淮上青山枕上看

小隱邱樊背夙期歸心如水夢如絲故園叢菊知
搖落孤負張翰兩衷詩

淮安舟次

歸颿日夜下揚州歷歷丹楓兩岸秋買得一瓶桑

落酒清淮明月照扁舟

泊揚州

天轉西風解客愁
片帆安穩到揚州
來朝又聽吳儂曲
別上姑蘇鴨嘴舟

揚州舟中示內

輕帆拂曙過揚州
歌舞如雲感薄遊
不向瓊花館裡醉
心知獨負廣陵秋

京口

吳兒生小狎潮頭
晚渡秋江不解愁
我亦尋常貪看水
半飄落日過瓜州

虎邱夜泊

奪目溪山錦作堆
人家多近水樓臺
生憐今夜吳宮月
偏照煙波濁酒杯

吳江遇雨

楓橋昨夜月如鉤
江上吳歛枕上游
今日鸚湖遭細雨
逆風吹進小船頭

新墅示內

石門細雨點秋波
小港穿來逸舫多
逸舫見王漁洋句
烏

柏葉紅桑葉落采菱人
唱采菱歌

鴨嘴船頭浪作花
晚來小雨密如麻
莫愁歸路多

彎曲明到錢塘便是家

次韻周菊山見贈之二

進取非狂簡交遊是底忙偶因占白鵠聊復買紅
妝春醞寒猶綠秋橙晚更黃醉來歌一曲遮莫顧
周郎

樓前梅花未開詩以催之簡同社諸公

曾憶霜根數寸栽凌寒玉質最先開未應老去全
無力想為春遲懶得來翠羽林間猶悵望焦桐絃
上幾徘徊孤高偃卧踈籬下欲借新詩為一催

讀史偶題

前有商山四皓後有壺關三老同是一言悟主獨
恨千秋不早

一誤豈容再誤摧虺不若摧虺故劍微時安在望
思臺上歸來

次韻周曆長表兄兼簡菊翁

宮牆秀色映比鄰周子牕前草似茵歲暮得為閒
處士歸來都是倦遊人太平神鼓頻驚夢元祐梅
花已鬪春為報竹林南北阮好攄幽思賦安貧

雪後同單六附舅祖家堯文兄如長河從
西興塘扶屐徃來興頗不淺歸家得周菊

山和澹溪詩因用來韻

雪後山光射眼明長河歸路傍沙行微微官柳回
春意處處晴簷做雨聲借竹池頭冰似鑑翫江樓
上玉為城年來腳力多強健一路無勞走馬迎
龍圖閣下穿花過燕喜樓邊認竹行結得一雙詩
隊伴喧來數里醉歌聲江添春溜初消雪嶺帶寒
光半入城乘興不知歸棹晚非關到處有逢迎

留別內子

樟亭春色上征袍笑別南園第四遭不是心腸如
鐵石須知吾輩豈蓬蒿樓前萼綠花如繡江上相

思柳似條帶得司空舊孤劍欲憑風雪淬霜毫

吳門舟次二首

蘓揚歌舞亂紛紛憶昨歸舟共細君今日重為吳
市客回頭不見越山雲百花洲上春光合廿四橋
邊月色分緘得家書難寄與獨瞻牛女悵離羣

春色朦朧夜氣浮滄浪亭外暫維舟梅花約畧窓
前瘦明月依稀鏡裏遊別路愁聞款乃曲羈人寒
倚牡丹頭牡丹頭船名知君願學臨川婦手搦蘭亭自

寫憂

夜泊虎邱

山塘樹色暗前津喜見花燈照眼新一昨同舟真
似夢重來繫纜恰逢春迴文錦上愁隨線連理枝
頭月傷人安得芙蓉開舊館芙蓉館先
曾祖別業與君相養
白頭親

夜泊缸尖對月

十里湖鐙映客船月光如水乍清圓偶携日鑄無
雙茗來試江南第二泉所恨片帆尋遠去更看孤
影坐相憐鄰舟忽唱吳儂曲入耳鄉思倍黯然

元夕新豐夜雨

蕭蕭春雨打船篷歷歷鄉愁繞夢中只有詩篇消

永夜了無燈火過新豐離家略似孤飛雁送客生
憎五兩風行盡江南更惆悵黃梅花謝杜鵑紅

元夕後夜丹陽對月

江浦愁雲黯復開重重旅榜趁潮來為憐二八嬋
娟月深酌尋常漱灑杯燕雁南來同信宿春山北
顧獨徘徊北顧
山名東風吹我懷人夢繞過西陵舊驛
臺

淮安舟次

春光駘蕩柳梢頭滿眼清淮感舊遊晴獻遠山來
積翠岬融殘雪駐孤舟客邊漸覺鄉心改別後誰

傳旅夢愁莫向高樓望西北征袍早已過邗溝
渡河宿楊心水家

十載光陰客路多勞勞頽尾意如何黃河渡口風
兼浪紅粉壚頭醉復歌越絕漸如天樣遠江南疑
是夢中過遙知繡閣吟詩夜自掩殘燈駐錦梭

黃家營始發

芳草青青路欲迷長安直北馬頭西十年對策無
知己一旦飄蓬愧老妻燕子來時先杏雨杜鵑啼
處隔春閨含情更有風前柳細舞蠻腰滿大隄

桃源道上

出門大笑向長安草草離情強自寬幾轉流鶯來
倦枕一回殘夢逗春寒紅飄風片帘前雨綠染晴
絲柳下餐記得昔年經此地桃花一埭馬頭看

紅花步

雲間春色滿枝紅自隔南冷便不同曉樹暗迷游
子騎霜花寒壓打頭風偶還家裏翻如客終日塵
中轉似蓬寄語羅敷休悵望雙飛那得學輕鴻

沂州道上作

游子長歌陸陸詞黃鸝唳唳轉高枝路岐不下楊
朱淚飯顆相逢李白時山帶蒼烟宜晚對野無青

草見春遲東南思婦休長歎自古男兒輕別離
淡蕩流風扇客衣離鴻寒帶夕陽飛窮郊未信今
生是托鉢徒添昨日非雲近龜蒙生氣色雨餘桃
李欲芳菲壚前買得羊曇醉卧看春山翠打圍

任邱晤邊漪園

膏車還過舊花封客舍蕭條近晚鐘不意故人來
促膝更叨春酒醉離容馬卿諫獵心徒切匡鼎談
詩興頗濃為愛君家好庭樹他年雞黍約重逢

豐潤縣學宮有商鼎相傳宋道君北狩所
遺明弘治中得諸田間以為守器予諦眡

之不過唐宋時物然亦足以寶矣腹內蚪
蚪五六行惟甲申八月丙寅數字可辨賦
此呈朱廣文羅世兄

何年寶鼎亦蒙塵流落沙場幾百春鳥跡誤傳殷
甲子龍胡不返宋君臣東來紫氣通箕斗西貢神
香配席珍我亦從來多古意獨尋竒字叩聞人

潞河溪藻堂偶題二首

小雨晴時燕子飛杏花開過尚春威擬為十日平
原飲借問王孫歸未歸

三十年来两鬢皤清貧太守命如何腰間尚有黃

六湖先生遺集 卷一
金印莫笈門無雀可羅

寓藥王宮雜詩六首

青門昨夜雪朶朶壓梨花似與春為梗非關月在
沙豐年問西野近事屬南華無限樟亭意躊躕天
一涯

東路殘春日西堂細草多閒飛驚夢蝶不柵聽經
鷺梁月思元度卮言傳橐駝門無賓客至聊且脫
吾鞞

客裏憐春去愁中較日長嫩紅經雨潤焦墨趁花
香悔與時髦接生添宿學荒邇來無錦句羞澁舊

奚囊

南能開寶地扁鵲有叢祠曲徑迷芳草懸籠叫畫
眉春光猶反掌客况似殘棋所喜長安近從容借
一枝

謾說長安近長安咫尺違紅塵隨去馬春色感初
衣投足知何似論交悔昨非梨花與桃李徒自鬪
芳菲

薰風來寶構嘉樹有濃陰所在成欣賞何須聽足
音夢回清磬住雨過落紅深遮莫相思鳥晨啼與
暮吟

苦雨

初陽久已匿連雨欲無涯屋漏牀牀似愁眉个个
皆亂雲深薄暮踈響滴空堦何日晴官閣清秋寫
客懷

秋懷

山閣仍清夜江鄉復阻脩東南有思婦西北望高
樓張翰多愁緒相如故倦遊此時對明月心折五
湖秋

送陳聖公表兄之官吳江

捧檄同仙尉皇華得舊遊三吳好風景八月正清

秋送爾之南浦懷人上北樓鄭莊賓客地西笑待
歸舟

送家仲錫兄之官長沙

尉亦親民吏瀟湘赴遠遊歸心先繞越別路未逢
秋南渡雙飛雁東歌獨倚樓因君懷賈傅極目送
扁舟

秋夜感興

木杪穿明月江樓度晚鐘寒燈仍閉戶秋思與鳴
蛩覓句分嫌韻開尊飾病容蕭條懷北幹許詢詩
蕭條北

幹猿鶴笑周顒

七月晦日偶成

秋來傷舊雨，假寐亦枯禪。
歸翼難隨雁，寒吟略似蟬。
此心同月晦，好夢逐誰圓。
南國無消息，愁人眼欲穿。

奉答徐鹿溪太史見寄原韻

久遊馮翊厭風沙，猶喜南臺對郡衙。
山若有靈應笑我，秋來無日不思家。
槐花黃處迷津筏，楓葉紅時感歲華。
却上高樓望西北，幾回叉手賦蒹葭。

八月十三夜夢回口占

月近秋分處處圓，碧紗窓扇隔嬋娟。
鐘聲敲斷寒

山寺夢裏依稀記昔年

月落參橫思故鄉，鳳巢池上木樨黃。
門前有路輕離別，紅粉樓中幾斷腸。

年來

年來無藥治心聲，且喜芳樽酒不空。
牕眼夜兼秋月白，燭花寒綴石榴紅。
家公猶未知山簡，國士誰能辨阿蒙。
悔讀南華成底事，鷓鴣堂下笑冥鴻。

沙河驛偶占

北望長安未倦游，又將書劔出平州。
人歸墟市如流水，馬挽鹽車趁菜秋。
映日參差黃葉樹，隔烟駘

蕩白沙洲路岐忽見擎鷹隊蘆管吹來塞草愁

邦均道上

七尺男兒心尚孩十年爛熳走燕臺自傷不偶真
如李敢謂招賢請自隗野燒合圍狡兔盡路塵豪
橫馬羣來東遊欲獻甘泉賦風諫無文愧楚材

六湖先生遺集卷之一

六湖先生遺集卷之二

蕭山

張文瑞

雲表別號恩齋著

因心齋近稿

春日良鄉道上



連騎出皇都嚴程信宿趨春風老火伴詩卷舊行
厨雪積山容歛烟深塏影無飛黃故人贈感激在
長途

送來素臣歸蕭山即依見贈家君元韻

命駕來千里相逢古薊遼追隨曾幾日惜別是今
朝途問桓公馬風吹季子貂桃源歸舊隱素翁居蕭山之

桃源

不受壘書招

琉璃河上

西山青復翠爛熳繞畿疆
寓目都欣賞開襟自激
昂官橋通聖水春樹接樓
桑立馬斜陽裡低徊竇
十郎

遊蓮花池

北斗迴春郭南樓映郡朝
泉源通一畝歌吹近元
宵舊雪花千片新黃柳數
條留連山簡馬難得是
今朝

靈雨寺

客遊多暇日嘯侶問慈航
一水環春寺層樓俯郡
隍曇花金作片貝字繡成
行歸路城南埭啼鳥下
夕陽

登保定府城屬目

燕雲仍舊服天府此巖疆
分野兼箕尾名山表太
行流風多感慨列國會衣
裳重譯通王貢便蕃即
帝鄉驛塵迷大路春雨暗
長楊易得榭山膽難開
汲黯倉太平元有道忠愛
不能忘今日三台上何
人是李芳

聞

車駕將遊五臺罷霸水春園
九重春色接蓬萊

萬歲今年幸五臺喜見恩波及魚鳥華旗不合水
圍來

過張桓侯廟

赫赫桓侯廟巍巍大道侑英雄存故壘氣魄想當
陽敵愾維王業離騷賦國殤人心與天日真可配
雲長

十五夜對月

客裏何濡滯燈頭慰寂寥梅花吹玉笛春色上紅

綃北斗長安近南雲舊國遙思君向滿月愁坐是
今宵

薊州道上

東道兼程返青門昨日違春雲連紫塞雪色淨朝
暉麥秀張堪郡山明李廣圍寨帷聽好鳥喚客不
如歸

上巳後二日偶成

連日東南上巳風杏花開遍淺深紅韋孃莫唱崑
山曲春思迷離似夢中

都門詠牡丹絕句寄內

六湖先生遺集 卷二
長安城裏見鞞紅似與家鄉色相同買得一枝閒
把玩客懷何以答春風

書良鄉旅店

春忽忽空咄咄高想滯煩襟俗境摧仙骨三五二
八清光圓一片愁心寄明月

勺藥花

勺藥花昨日花開紅的的今日雨絲聲點滴點滴
花枝愁殺人雨餘顏色今非昔閨中少婦春可憐
三五二八愁芳年朝朝暮暮待公子公子歸來妾
老矣人生歡樂須及早莫使紅顏向枯槁妾老矣
公子歸來耶君不見勺藥花

贈井大二首

為憶南宮老畫師生綃數幅輞川詩知君胸有真
邱壑坐對春空點筆遲

馬首西來喜得朋名題小篆各矜能臨池獨擅蘭
亭帖頓使長安紙價增

送周五

蕭條行李向京師半束殘裝半篋詩孤竹亭前一
惆悵槐陰滿地送君時

槐

五月江城吹落梅
心情懶慢倚雙槐
小亭正在濃陰下
時有清風入座來

杏

蹉跎春色負黃鸝
黃熟枝頭八達兒
纔見花飛仍結子
可知春過已多時

木槿

羨爾風流似楚雲
紅顏相映石榴裙
朝榮暮謝尋常見
山額黃時愁殺君

白芍藥

廣陵城裏黃金帶
孤竹亭前白玉盤
昨夜春風好

消息瓊華一朵月中看

當歸

隔簾錯認豆花肥
淺綠輕紅隱翠微
覺得年來無意緒
坐看零雨賦當歸

白蘑菇

雲州松繖字銀盤
水色靈芝照夏寒
若使麻姑來進酒
不須聖果雪餘餐

海棠

石欄風葉展紅裙
細雨空濛濕暮雲
看到玉奴春睡後
滿簾秋色醉紛紛

燕子磯次胡晴初韻

天塹銷兵氣龍蟠尚古初
六朝春夢寐羣盜聖驅
除吹笛江聲暮悲秋地
肺踈遙憐歌嘯處明月五
湖餘

寄表兄王載揚

不見王郎歲六除宦隨風味近何如
塵中那得真知己別後頻看舊寄書
金雀花時春過半烏衣巷裡燕來初
相思人對相思柳凭遍闌干歎索居

孔運使就竹亭詩

五行分衰旺地氣各一偏所以羣動植亦各有因

緣淮北無橘柚洛陽無杜鵑物理類如此造化隨
機權維究無竹箭於此忽有焉紛紛十餘畝个个
盈萬千小者圍徑寸大者如屋椽上枝交青冥下
根蟠厚地實為鳳凰食斑是湘君淚噓之以谷風
妙舞含春容照之以明月嬋娟窺玲瓏環之以洙
水倒影鏡光裏翰之以尼山葉亦垂亦起就之以
高亭結構天然成中邊無雜樹四圍羅管城誰為
亭之主北海孔文舉嘉賓不速來六逸命儔侶談
笑寓遊目清音動豪竹歌吟當繁絃何必絲與肉
時而進豆籩燒筍具梓筵東坡嘗云爾可使肉食

蠲亭隙種芳草長年不枯槁幽鳥無名數鳴嚶愜
懷抱大意唯此君坐對足娛老孫枝復挺拔玉立
相比肩天地不愛寶以取賢主憐往者文與可曾
寫篔簹圖真竹不待畫斯亭有以夫

廣文錢鴻老索新齋詩集杜工部句貽之

勝地初相引龍門客又新喜無多屋宇亦未雜風
塵把酒宜深酌傳經固絕倫美名人不及蚤晚報
平津

送常比部

用陶詩
規林韻

荏苒暮春初欣然接游居使君吾父執式好如友

于今日是何日惜別天一隅黃葉滿歸路清風載
前塗公歸巖廊上寧復思江湖長安亦咫尺不愁
嘉會踈西山在襟袖秋色佳有餘同聲歌驪駒臨
岐心渺如

送傅筆帖式

用陶詩規林
第二篇韻

傅侯抱夙譽才識兼有之通籍賢王府傅係淳美
王府下羨
爾青雲期况乃良大夫奉使同一時聲名動江國
恩澤宜在茲揚解以為賀杯酒安足辭君當靜以
需大用蓋無疑

聲子

聲子相逢後朝吳被譖時賜環終未得貽膽正堪
悲困石休明易聞蟬想賦詩還期重會合為爾頌
皇慈

和陶怨詩

佳人自南國清秋思黯然夫子輕別離遠遊凡幾
年大婦居東閣小婦居西偏燈火夜相照穿紗為
錦田中刺芙蓉圃上結鴛鴦屢繡成五絲枕枕乏
不得眠留以待郎歸道路何延遷促織響牀下明
月照牀前獨語還獨影慘慘如孤烟我思古之人
尾生所以賢

題表兄周六按劍吐長虹小影

繡衣公子鸛鶴裘彈劍歸來感薄遊不遇徐君心
未許獨披風雪慟西周

題畫扇

錢塘岸上蓼花紅每到秋期想故叢玉蝶與人成
喜夢滿湖明月畫樓中

悼亡

與君結髮一星終苦恨人生命不同七月相思子
搖落霜花染作杜鵑紅

他生未卜此生休孤負心期是薄遊今日還家獨

不見畹蘭花謝錦江秋

悔殺歸來不及春夢中見汝苦難真粧臺卧榻仍
依舊只少當年舉案人

厲市湖陰舊鬼啼石楠樹下作秋閨東邊是爾先

姑墓事死還憑孝閨妻

亡妻私
謚孝閨

陳烈女詩

秋閨蕭颯夜淒其烈女風聲世所悲未戒於禱能
守節自經溝瀆見良知口銜片石為精衛魂返重
泉是子規後五百年人記取曹娥不愧蔡邕碑

雙橋別井字寅趙敬文徐慕伊

客路蕭條黃葉飛青門相送故人稀飄飄一似離
羣雁萬水千山獨自歸

次泰安州呈曉村

云亭紅葉雨殷殷浩蕩天門未及攀苦恨此行心
緒惡了無才語賦名山

沂州題壁

有生行役苦無涯髀肉消磨又赴家一路霜紅秋
爛熳五更殘夢月橫斜詩題舊壁痕猶在酒照新
愁量不加何處啼聲最嗚咽青駝寺裏後棲鴉

清江浦

皇華亭際暮烟浮病葉蕭蕭兩岸秋還似昔年殘
夢裏清淮明月送歸舟

次韻訓曉村二首

朝望燕雲暮越雲隻身南北苦難分可憐我獨無
兄弟美爾衡陽雁一羣

身似黃楊厄閏年窮途賴有故人憐夜來忽聽江
南曲容易愁人是管絃

次韻曉村題陸放翁小像

杏花春雨想當年天語曾將好句傳畫裏相逢不
相識美髯錯認是坡僊

過京口

樓船四面啓雕窓坐對秋濤氣未降喚得竹西新
鼓吹滿颿風雨過京江

望金山作

何年險設玉浮圖砥柱三江帶五湖虎踞鍾陵天
與印龍飛遼海地輸珠樓臺夜闢金銀氣草樹秋
明錦繡襦寓目十年難造極浙潮徒向廣陵趨

過滸墅關

姑蘓秋色水雲間新月蛾眉照遠山兩岬樓臺上
燈火一帆風力下吳關

虎邱口號

夜渡江關不繫舟歸心正逐水東流
可憐新月如鈎樣零落吳宮一片秋

將至西水驛

語兒亭上月昏黃一片秋波帶粉塘
背立船頭看北斗離情千種在灤陽

次樵李作

北風三日送輕舟烟雨樓西月似鈎
鐘動五更須解纜明朝準擬到杭州

次韻王遜老見寄

門掩江郊守故壙揆珠何處覓驪龍
雙魚少得真消息十載長憐舊過從
地隔輞川遲載酒字摹逸少愛藏鋒
不知今夜蛾眉月影照環滁第幾重

次韻蔡梅菴見慰之作

芙蓉池館隔年回仍復蓬門倚水開
游子獨吟懷舊句山妻應上望鄉臺
名非賈璞勞增價身是炊桐愧取材
未信南薰能解愠今朝愁破為新裁

西江塘即事

徃者頻遭劫潮來不可當九鄉愁汨沒
三縣忽溟茫白紙催畬米青苗補早秧
大灾仍薦至比戶欲

流亡慘目驚重見同舟好細商均田攤手實

得利田每

畝派錢列辟會衣裳

山陰會稽蕭山三縣

官奉委照例踏勘協濟依

成例經營就故疆游楊先立政

宋游酢為蕭山尉

山會并輸將克水多培土私霑自裹糧高卑因地

勢脩築預農忙若以鄰為壑真成燕處堂蚩氓難

喻曉智士漫譎張受任人殊少因循禍未央長思

痛定意何以保金湯

南樓秋思

微寒霜落後蒿目此登樓嗚咽蘭亭水畸零黃葉

秋無絃音總廢故劍影難求漫憶蓮池筆沉吟第

二句

無題

銀河清淺隔牽牛繡閣紅窗貯暮愁隱現淚痕無

那月暗傷心緒不關秋黃臺瓜落初更戍金井梧

寒正倚樓謾是琵琶能寫怨已曾泣下白江州

題沛施畫獨鳥

世上誰憐羽翮奇荻花秋水寄相思圖南未就猶

雌伏似我孤居寂寞時

十一月二十日早赴梅隱菴口占

山縣猶殘月徐行破曉寒霜花滿田坂烟樹蔽江

大湖先生遺集卷二
十一
千水影涵珠閣經聲近石壇自來貪佛日常作道
心看

贈詩僧文藻

平時見說汝能詩技我珠璣更不疑前世想為賈
島佛再來莫是沈蓮池擁鑪夜撥茅柴火覓句時
攀栢樹枝既是宵中多智慧問師何苦出家為

丁素存招飲有感

十四年前秉燭遊今宵重醉月池頭每經舊第傷
懷抱况是槐黃葉落秋

舟過西莊呈曉村

柯亭山下水東流憶共亡妻此舊遊今日重來非
昔日孤篷獨泛錦江秋

次韻和王博齋雪後宴浮湘閣酬趙都督
之作兼呈毛十五

浮湘閣上敞芳筵心賞難逢雪後天謾道將軍寬
禮數也知揖客是詩仙竹林疎響鐘初度湖水無
波月乍圓秉燭歸來非夜獵滿船春色擁華顛

六湖先生遺集卷之二

男 學懋盥手敬錄

後學陳學澎頓首填諱

西陵王憲文刊

六湖先生遺集卷之三

蕭山 張文瑞雲表 著

淺綠山房稿

曉村攜子見過



東風吹選客江縣泊仙舟公子為黃歌佳兒似仲
謀新詩知滿袖春酒喜添籌明月梅花夜同君一
倚樓

酌酒與曉村次韻

玲瓏休唱路行難愁對金罍強自寬手裏不辭三
昧酒燈前且盡一宵歡春寒作凍遲花朵臘味餘

辛薦客盤再二十年婚嫁後大家重話小團圓

南樓讌集次韻酬梅菴

萼綠花前引興長門多車轍有輝光一琴謾作無
絃譜三日猶聞在坐香蘭葉歲蕤迷夜月柳條蘇
醒為春陽何當珠玉頻投贈題徧賓山舊草堂

先子

那池舊第
為賓山堂

前題次韻酬菊山

人日看花到草堂即於花底引壺觴春盤薦臘為
魚凍北味投南是酪漿坐倚石欄分少長罰依金
谷謾請張勞君為我吟嘉樹從此周親更不忘

覺海山謁先司空墓

桑田滿目松杉盡玉帶江寒遶墓門二百年來清
白在一間茅屋住雲孫

携兒過外家舟中口占

浣錦江頭柳色黃上燈天氣日初長春遊帶得癡
兒子謾與時時說渭陽

遊蜀阜寺示僧沅韻兼呈曉村

寺憶曾遊十八年重來風物故依然浣江村後藏
春塢蜀阜橋西過客船畫棟舊題元歲月塗山長
記夏坤乾何人肯解黃金印伴爾長齋繡佛前

六湖先生遺集 卷三
奉訓周三十六表叔贈行原韻

東裝又復向京華，慙愧春風滿路花。
似蟻長安市上酒，為家寵行數合周。
才感惜別心，懸魏闕，賒秋以為期。
同捧檄，看君文教振幽遐。

次韻留別周雲際妹夫

默默傷懷抱，怱怱惜此行。
倚閭慈母望，携手故人情。
驛路仍西水，風沙向北平。
自來無別淚，今日為君傾。

二月二日菲社讌集歸途口號呈王博齋

魚懷周荆山

二月春光照眼青，十年朋舊惜凋零。
西河翰苑仍嘉會，東壁文書尚典型。
鄉飲偶隨杖者出，詠歸猶喜醉翁醒。
此時同憶龐居士，自掩禪扉諷貝經。
荆山

表兄好禪時往來梅塢天竺間

瀕行留別諸親友

趨庭將母命，垂橐向京城。
釃酒行人色，牽衣稚子情。
東風吹馬首，南浦怯鶯聲。
三十猶萍轉，飄飄愧友生。

秀水舟中奉酬周菊山贈行十二韻兼寄

同社諸公

六海先生集卷三
結客樟亭下長安西笑西梅花明驛路細雨濕江
隄行藉春為腳愁兼醉似泥三吳仍泛鷁獨夜乍
聞雞赴闕傷留滯趨庭惜久稽東風吹雪浪細柳
轉黃鸝失學嗟何及逢時歎不齊思親雲共遠懷
舊首頻低隻影雙游子重泉一寡妻神交多契濶
誰與更提撕內熱須甘蔗詩脾想卜梨永平方物
卜園之梨
離家已信宿無夢抵空閨

次西水驛呈曉村

朝辭石門縣暮駐水西樓一夜聽風雨孤城背客
舟花憐紅粉濕山似翠眉愁何日同歸隱槎頭下

釣鈎

吳江舟中即事

曉來新雨霽客裏當嬉遊書倩風翻葉船隨浪打
頭野橋憐寶帶征路問花洲二月吳江上春寒猶
敝裘

吳門別內弟宗孟

積雨連吳會扁舟向北風鄉心殘夢裏春色短亭
中為寄家書去還看馬首東憑君告慈母不必念
飄蓬

同曉村遊虎邱

六湖先生遺集 卷三 四
游冶仍連袂山塘暫繫舩春光愁緒外行色暮帆
前石傅西施粉花含紫玉烟同君凌絕頂一望越
中天

瓜州酬周菊翁見贈三十詩次韻却寄

賤子慙生日來詩枉所申春光餘半股旅泊復相
因把酒將愁放逢花覺路新瓜州看霽月惜別已
經旬

維揚舟中作

長江生暗汐斜日更移船接浙懷尼父傷春與枉
鶻琴書愁總廢兒女意遙憐遮我東南望揚州花

滿烟

露筋廟

何世祠神女清淮綠映門殘碑無實錄故里有空
村碧化千年血香消一夜魂從來嗟失路為爾酌
芳樽

淮安夜泊

江北風花接淮西水宿仍連檣齊畫榜隔浦見漁
燈客睡殘更覺鄉愁五夜增十年游蕩子一似打
包僧

途中口占

離亭別後有餘情江北江南處處鶯
渡過黃河逢大道馬前春草向愁生

次潤河集

車前芳草綠柳葉亦初黃九里知河潤三千覺路
長春犁猶待雨宿麥漸抽芒隨意休征旆壚頭酒
正香

郊城皇恩亭口號呈曉村

南來欣共雁北去喜連鑣十室彈丸邑千秋傾蓋
橋野槐春落子官柳暗抽條一嘯云亭下長驅慰
寂寥

山行

春寒山店曉細雨杏花初一棧平於掌雙轡信所
如雲深青嶂合巖邃翠微虛尚覺機心在溪頭羨
釣魚

梁莊呈曉村

同車趨北闕結駟入青州野店蓑衣餅山莊椿蘭
紉羈棲憐墨突風俗近羊流羊流地名好把殘詩
句時還續舊遊

經鰲山作

秀拔諸峰內春來積翠深仙源迷洞口雨氣接蒙

六湖先生遺集 卷三 六
陰山樹斂雲髻谿泉軫石琴還將青眼望驢背一
行吟

望嶽

跌宕天門下嵯峨萬丈看東封懷漢武西笑望長
安呼吸通霄漢翱翔乏羽翰迴車一延佇梁父暮
吟寒

途中述懷

江南春水綠江北楊柳黃行行入齊魯眇眇燕趙
疆河山閱帶礪世路由滄桑驅我薄笨車趨走聲
利場側足媚公卿覩顏熱中腸人有能不能是非

我所長寧從一瓢飲不羨食萬羊疇昔在臨淄結
客懷益嘗今朝過平原高塚何淒涼人生如駒隙
游子思故鄉

過平原

走馬平原縣青青柳向城他鄉逢上已昨日過清
明草草勞人意翩翩公子名緬懷千載上攬轡不
勝情

河間

河間三雅樂文獻足千秋芳艸王孫路斜陽帝子
樓風沙迷涿鹿冠蓋入皇州匹馬紅塵裏年年此

薄遊

涿州曉行

長安違咫尺破曉過樓桑花重蚩尤霧春深召伯
棠斷酤知國禁時嚴禁燒鍋改火憶家鄉滿眼西山色
添余別恨長

別徐慕伊

此別長安市君行返故鄉不須傷下第且自慰高
堂翠竹冬生筍黃花晚更香只憐離索意圓月滿
空梁

賀陳子翹成進士

家君門下士子翹蚤聲名禮部今高選天涯慰友
生且為窮太史不作老虞卿媿我塵埃裏花枝耀
眼明

次薊州寄曉村

青門昨日別一路杏花秋東道多賢主漁陽是舊
游春風吹旅鬢細雨濕輕裘那得黃公子同來一
寫愁

送舍弟立表還獨石口

朔易羈棲日東來寂寞時相逢憐弟瘦揮淚憶親
慈一雁分飛去連枝更有誰過庭多暇日好下讀

書帷

日食詩效韓吏部體

是歲乙未春四月丙寅朔完完白日繫圓靈光華
爛熳如新浴漁陽花滿艷陽天浩態狂香多結束
予時羈居育才坊獨騎欵段恣遊目亭午出城南
行繞珠山麓惠風飄飄拂我衣山額黃時就館穀
入門下馬向茅齋猶有童心殊不足坐見堦前一
扇塵歛地歛上東家屋萬里邊庭雲氣生紛紛蒼
狗爭相逐黑風夜又扛海來何論傾盆與拔木須
臾虹見雨忽收自我歸來茶未熟舉頭西盼太陽

精纖纖不盡如鈎曲何物凶蝦蟇無忌恣口腹日
為天眼睛爾廼敢魚肉二十八宿無寸鐵空張旗
幟搖川嶽日有急難不能赴左龍右虎徒牙角
皇帝清問及下民欲弭災變何以贖凡百君子有
官守三拜屏氣皆俯伏草莽賤臣上書言脩刑不
如修德速

九重徹樂減玉食大臣無敢作威福東閣進賢才
西曹出寃獄瞽者鼓汝鼓庶人嗇夫馳走無編縮
諸陰縱者閉一陽剝而復天人交感如影響此理
可悟不可告春秋二百四十二年中備書日食月

不錄此間輕重有權衡聖人萬古一明燭

練泉亭

泉在遵化城東北隍間舊名烏龍宋相國權撫軍時易今名

寂寞臺隍下泉亭慰薄遊碑憐朱竹垞名重宋商
邱水色清無比春光慢不收那堪明鏡裏獨照旅
人愁

惜春詞效温飛卿

錢塘四月春如縷鷓鴣力盡啼聲苦鴨綠紅絲劈
海棠雀金黃瓣泥梅雨笑買湖山蛾黛濃弱憐風
柳腰肢嬾正是桃花孕子時王孫草色愁南浦

遵化重遊大佛寺

疊閣層樓上茫茫起客思遠烟春樹火斜影石門

旗

石門諸山翼道左右旗鼓一

孝陵馳一相當

風物猶前度登臨此一

時空餘青葉髻

范石湖曰金剛一名青葉髻

也解笑人為

五月朔日即事

都門五日賣花枝盤玉圍金壓路岐

玉盤盃金帶圍並勺藥名

十里東華遲去馬通微佳境午鐘時

通微佳境勅賜西洋館

額

夏夜露坐呈子翺庶常

辛壬癸甲歎睽離幽逕相過此一時同在長安愁
索米獨憐匡鼎善論詩沙山薄暮纒歸第風月今

六法先生遺集 卷三
宵乍解頤我亦十年游倦客卑棲猶喜傍高枝

雨後漫題

青門新過雨爽塏似秋期信美非吾土投閒是此時
時行厨香積飯暝色美髯祠爬壁愁看蝎低垂一
賦詩

金臺漫興呈周曆長表兄

旅食京華黍蕪遊雞棲暫借矮簷頭文園病渴功
名薄茂叔吟風臭味投寺逼宸居虛想像

五兄約遊愍忠

寺不果雨餘幽徑信淹留回中近報

王師捷一曲涼州自寫愁

遣興

京華親舊喜同遊笑語如蘭竟日留舌試毛尖除
病渴手談玉石譜閒愁小堂細雨初消暑高枕微
涼已送秋還憶家鄉好風月苧羅山下水西流
昭王臺下路羊腸猶喜蘭交聚草堂一夏連陰經
暑雨五更殘夢近秋涼浮瓜沉李童茶飯明月清
風客廩糧悔讀蒙莊成底事行年三十未為郎

夜雨口占二絕句

夜來風雨滿京城蕩滌煩襟暑氣清直到酒闌人
靜後蕭蕭還似竹樓聲

六湖先生遺集 卷三
雨餘餘雨滴空檐牽率離愁倍黯然知是誰家擊
玉笛聲聲吹到枕頭邊

苦雨次韻子翺太史二首兼簡徐彩升先
生

連雨何時歇天晴不肯明風雷迷大麓草木作秋
聲未信龍蛇鬪虛疑穀洛爭還當需酒食聊且解
愁城

南方亦苦雨卑濕殆何如况是愁中聽真成釜底
居艸堂遲過客天井欲生魚何日逢晴景相於一
曝書

孝閔生日

今夕伊何夕天涯浪出遊生憐新月色空照舊山
頭悔別龍蛇歲悲歌燕趙秋黃泉不可作忌日更
添愁

秋思呈曉村

長安秋月麗晴虛天宇微涼枕簟餘夜合樹頭花
落盡柔乾河上雁歸初前雲誤散巫三峡舊夢相
逢鬼一車七夕年年笑牛女爭知此恨不饒余

潘年

潘年不相待杜癖竟何成明燭空廊影黃昏細雨

六海先生遺集 卷三
聲同瓊皆密戚隨寓有餘情終夜寧離緒惟愁白
髮生

佳人

佳人難再得酒色抵愁濃碧落一聲雁黃昏何處
鐘夜吟多蟋蟀秋色少芙蓉返壁饑驅日低頭媿
晉重

恭賦

御製泉甘剖翠瓜

靈泉通

御苑餘潤及陽坡最是秋瓜好勝於諫果多冰心

還似水峰味不爭駝欲獻黃臺咏其如再摘何

秋夜憶亡妻

纖月初生夜殘燈欲滅時暗傷秋一度空與鬼相
思白露漫新塚黃花改舊枝何由覓夢裡為爾畫
愁眉

賣馬

屈產由来重如今識者誰可憐賣駿骨不是換蛾
眉擾擾長安市蕭蕭秋雨時一鳴知汝意莫戀主
人為

重九前一日作

料峭西風酒色天

燕俗謂陰雨曰酒色天

槐花黃落菊花妍

客牕盡日無人到愁絕中郎第一絃

因人之陳州寄載揚

早歲同遊學吾今亦在陳飢驅隨老父暖眼傍時
人燕谷三秋雪繁臺十月春相思如有字看取北
來鱗

秋暮書懷

智效官何有愚蒙性不移一秋隨手過三十讀書
遲舊友成踈迹慈親念遠離南中聞苦澇愁絕蟹
荒時

單處士哀辭

北風蕭蕭兮砭骨髓病泔泔予扶不起上有慈親
下妻子哀莫哀於客野死

長安對雪

東風未解凍朔雪滿皇州色比形鹽潔花如瑞麥
秋看山疑聚米泛月憶迴舟今日瑤臺上真從玄
圃遊

六湖先生遺集卷之三

六湖先生遺集卷之四

蕭山 張文瑞 雲表別號梅隱 著

當歸小草

燕九漫成



日下逢燕九 羈棲轉寂寥 愁絲春作繭 歸信暗如潮
佛手傳香味 人參驗寶苗 道南能小隱 未敢羨扶搖

次韻安溪相國留別北地同學諸子二十

韻代人

昭代調元化 如公有幾人 蒼生沾潤澤

天子愛儒醇和范傳衣日程朱墜緒振漢池戲亂
後闈陌上書辰特起東山傳欣於北學親十年時
雨決三輔道流新載獻千秋鑑同歡八表春取材
收藥籠言性指梁津聖域先希孟河源必向秦借
籌憂汗馬吐哺接衣鶉明易探微旨談經啟後民
聯班榮晉接得御喜相因丰采今猶壯聰明老益
神還山情漫切懷闕義尤真不及仁風扇深愁理
路榛青門行惜別白鹿意誰陳臺閣虛朝席鄉邦
慶蜡幽雙轡歸海嶠百辟餞清晨瞻斗思公輔為
霖憶老臣來茲期復相 帝命已重申

天壇訪常宮庶不遇

周折風廊下塵襟一暫開無人應剝啄立馬久徘徊
不待飛花送空然載酒迴為憐壇樹色心許後
重来

輓徐廣文

家份吾舊友相識自遼西薄宦能將母初貧悔出
妻有才堪製錦無力作階梯試北頻顛躓圖南竟
悵悽三年鵬鳥恨一夜子規啼科正傳經處何人
過馬蹄

送趙郎中守金華

代字
寅作

君侯銜寵命紫綬縮金章寶婺為名郡皇華出故鄉

聖恩春爛熳 天語昨輝煌祖武繩清獻斯文式履祥權宜初借冠懋賞即徵黃家政傳論語風流衍廟廊岑樓開八詠雲水似三湘坐嘯龍門月行然越府香南人將被澤北學倍生光况以姻親厚兼之臭味長屢空沾富潤跬步藉周行舊託平原客曾瞻漢署郎同車慙薄笨岐路惜參商舉最聽尤異還期下鳳凰

贈浮屠雲霞 并序

雲霞姓周字聖臣嘉興人往者家君為平州雲霞曾在幕下雅善奕碁昨來相見不意其為僧也因貽以詩

往在青油幕今為白足禪殊方偶相值彌日喜留連玉石彈棋暇雲霞過客緣紛紛十九路似爾獸超然

春日赴選口號呈黃曉村

吏部門前曙色黃衝寒漫與選官場蚤鶯啼處聲猶澁快雪晴時凍未煬三載騎驢愁出入十千沽酒信行箴邇來會得榮枯意試看吳藤一樹香

吏部

六法先生遺集 卷四
廳事有明吳文定
手植老藤一本

賦得春雪可愛擬 暢春苑

御試

乍覺鶯簧好還看瑞雪新似嫌花信晚先綴

禁園春潔比堂廉玉融霑輦轂塵和風吹遍及萬

國頌平均

花朝送友人南歸

漫惜怱怱別相期得得歸即今春作伴却與燕同

飛細雨江東棹新苗山北薇憐君尋舊隱偏我寸

心違

寄女弟

命覺年來舛春憐客裏分思親常愛日憶妹但看

雲通籍仍何補平居固所欣廂樓須灑掃歸與汝

論文

春日燕邸雜興

愁減羈眠乍穩春分愛日微和一路桃花歸去故

園楊柳如何

鄉曲頻經寃夢京華絕少交游博得躡鴟娛老爭

如萱草忘憂

一粥味兼黃白三餐力盡珠薪我欲巧炊無米誰

能削雪為銀

一別茂林脩竹每懷明月清風

明月清風邑中二里名

誰謂

西山爽氣

西山即蕭山

不如東華軟紅

行避馬牛風鬪坐愁酒色天工竟日稀聞剝啄此

身如坐山中

怨似待年紅粉厄於再閏黃楊擬折青門細柳歸

來淺綠山房

賦得旅食京華春

漫游成底事遷次更逢春行傷陀羅轉愁牽御柳
新鑪煤炊熟食杯水雜風塵賴有殘書卷昏然伴

旅人

送徐慕伊孝廉

一春行欲暮歸思亂如雲舊友寥寥見新花稍稍
聞西山須暫別南浦漫同羣今日青門柳先枝折
贈君

嘲風

箕與月相遭春風聲怒號打頭渾欲痛放鷄頓能
高若道傳花信何曾似剪刀還疑故江上子午作
波濤

題相國溫文簡公像二首代人

舊學甘盤贊聖謨臣心似水置冰壺十年丰采瞻
臺閣三接光輝想畫圖漠北賢勞垂豹尾召南功
效見騶虞千秋錫命昭遺範留與孫曾作楷模
龍章象服炳丹青風度誰能似九齡綠野未營裴
度墅穹碑忽樹蔡邕銘朝端儀表思耆舊天上光
芒落輔星可但哀榮優禮數會看麟閣詔圖形

來爾登見示關外紀行詩并途次永平見

懷家君之作走筆鳴謝

千里非虛徃三韓似勝遊詩才隨處見春色入關

愁昔日張堪郡今時謝朓樓永平守今為謝公賜履勞君歌

麥秀臨眺獨躊躇

留別曉村宗殷

從吾叔度別芳草綠初齊愁日隨春暮離雲逐望
低兩行楊柳色一路鷓鴣啼歸到芙蓉館何由見
故妻

小寒食長安漫興

紫陌紛紛眼界新千花壓擔罩輕塵榆錢打餅為
寒食柳絮沾衣覺莫春野祭佛頭香種種空溝天
氣臭陳陳不如歸去南湖上猶是蓬萊一散人

都門志別

六海先生遺集 卷四 六
暫作青門別居然薄笨車隨身書數卷分手路三
义今昨交情見酸醎世味差生憐河上柳還似舊
春華

別胡沛施

去國勞相送情親似友于風塵迷大井地名涕淚
哭岐途北顧甘棠在南轅舊馬無由來重離別落
日更踟躕

涿州道上

絕轡行箕野歸途出范陽馬頭斜細柳日色上樓
棗去國愁三宿吟詩泪數行旗亭枯望眼四海一

羊腸

過趙北口

霸水春園後雄關曙色新林花明舊縣淀柳暗通
津久客無金贖歸田有夢頻勞勞堪自慰却勝未
歸人

獻縣道中

歸路愁陰雨今朝喜巽風寒烟周舉食蔓艸獻王
宮鳥弄深枝裏花明宿霧中王孫畱眼處最是白
頭翁

景州野望

六法先生遺集 卷四
甸服彌春望云亭展客襟鶯聲花裡出塢影霧中
沉細柳營何在甘棠詠至今周南一迴首想見古
人心

次高唐州

好雨壓輕塵行雲復近人
野花籠暮靄官柳染青
春傳食兼金費周流改火頻
高唐殘夢裏斗覺旅
愁新

銅城驛見梨花

春寒三月次銅城
駐馬風塵眼暫明
却似遼西舊
遊處梨花如雪打黃鶯

次東阿縣

落日兼春暮銅城去國賒
水傳阿井味山有杜鵑
花藥裏隨鞍馬詩瓢趁物華
飄飄還自若陸地一
浮槎

過東平公冉子祠

騫冉諸夫子皆為百世師
斯人先聖惜具體後賢
知故國傳疑塚春山繞特祠
如何青草裏不見鹿
門碑

茅坤集有冉子祠堂碑記

詠路傍桃花

何限淺深紅飄零客路中
可憐春老大薄命嫁東

風

過仲家閘謁仲子祠

重遊君子國再拜衛公祠壇樹凌春靄

宸章妙色絲今上賜額曰聖門之哲道源清濟潔古廟碧琉

璃小立迴廊下長歌雄雉詩

過南陽湖

北至多陳迹南陽亦再經湖波三月綠春草半邊
青斂翮隨鷗鳥乘流應客星隔檣吹短笛幽咽晚
來聽

夏鎮阻風

閏月初逾濟東風正送漕斷橋春纜繫逆浪白頭
高懶慢時歌枕餘寒怯換袍湖邊已曛黑何處覓
香醪

新河口

綠野明新霽高春餞暮霞源頭來活水曲裏漲寒
沙詩憶曾遊處春深未落花扁舟隨意泊歸路莫
愁賒

過淮

南歸如夢裏縹緲望揚州青草愁春色黃河笑濁
流燕高飛莫逐魚甚美堪求斜日淮陰市躊躇舊

酒樓

家虛園叔淮安衛署

奮武街新命提封近故鄉歲供劉晏米鄰接召公

棠謝安去鎮人比之召伯魚水斯為美烟花興甚

長他時如乞郡未敢薄淮陽

移舟

揚州花滿眼接浙更移船去國日以遠歸心忽浩

然江流暗長水麥秀乍晴天我是傷春客休來叫

杜鵑

遊茱萸灣高旻寺

行宮

自古烟花郡茱萸水一灣

御詩留佛地駐蹕對春山燕喜榮三寶龍光照百

蠻今朝南渡眼從此望

天顏

擬遊惠山不果

畫舸凌晨發青春伴客還惜花憎好雨拄頰戀名

山泉酒從泥醉香塍待屐攀歸帆不可落惆悵水

雲間

送蔡式金之漢陽

送君曲江上

浙亦名曲江

縹緲望荊州
征路三梅雨
離

騷一部秋賢
兄為大邑勝地
讓前遊我亦諸侯客
茫茫起舊愁

望航塢山

兩山相望鬱嵯峨
竹樹交加似苧蘿
我欲買山從此住
眼前常見錦江波

西莊

畫橋西畔錦江樓
細雨丁東送麥秋
十五年來殘夢斷
絡絲聲裏更添愁

四月十九夜冒雨至厲市湖哀孝閔一首

康熙丙申夏皇天降霪雨勢如劈竹來十日不肯
住富春諸山水凌駕潮頭怒兩大相擊撞水僵立
不仆我愁西江塘決裂在旦暮豈徒兼愛心內亦
懷私故眷念黃孝閔猶未歸邱墓萬一遭衝決深
惟漂泊懼昨來具舟楫欲問西河路舟子掉頭云
橋低不可度夜半出東門繞城復南沂浩蕩叔魚
坂行人嗟脫步茫洋厲市湖曠若錢塘渡繫纜舊
沙邊蕭然環四顧雪涕語亡妻我語妻莫啼憶昔
為夫婦歲汝在深閨譬如枝上鳥合食而雙棲不
幸汝為鬼寓汝山之谿際此風雨夕知汝心慘悽

汝心將母痛汝目將母迷汝骨將母寒汝肉將母
泥我將求地師葬汝園東籬返魂作黃花以償君
所思水厄有我在慎勿驚怖為

端午

重午無聊賴淪陰黯不開荒城圍白浪舊雨接黃
梅楚糴遺風在楊家早色來仲夏楊梅先熟年飢
傷美節無意醉深栝者謂之早色

西莊夜航絕句

一雨初消暑扁舟載月過夜山深似墨湖水淡無
波

芙蓉灣口號

芙蓉灣裏棹歸舟野水瀰泚泛遠愁幾樹蟬聲催
落日一行白鷺近清秋

過梅隱菴

梅隱菴中浴佛金雞橋北迴舟略似山陰道上綠
槐烏桕如油

水鳥也能說偈山龍早會聽經一別已公茅屋今
來兩度秋螢

遊寓園

明祁忠敏公
彪佳殉節處

孤舟窈窕次名園擬向金童乞寓言初與夫人商
氏才貌絕世

時稱余童玉女池底有天留日月山中無地與兒孫偶題

止水終成讖誰讀懷沙不斷魂此是越州生色處

君臣大節至今存商夫人哭亡詩云君臣元大節兒女亦人情

麻溪

舍舟行斷岬天樂數峰斜秋色紅於染山溪亂似
麻畬田收火米崖蜜割松花吹散朝來酒樵風過
若邪

青山

省墓青山去扁舟一葉孤霜紅烏桕樹水落上湘
湖蘚石痂初蛻陽坡草未枯蕭條四正地孝享獨

踟躕

題十八學士圖

東宮一鑑未歸秦天策先收羽翼臣可但謀猷堪
撥亂試觀文采亦殊倫丹青自寫潛龍意版築誰
圖肖夢人千載至今還想像玉堂天上大唐春

六湖先生遺集卷之四

男 學懋恭騰寫

宗後學應曾恭填諱

六湖先生遺集卷之五

蕭山 張文瑞雲表 著

孤雲集

送王博齋遊贛州



予家北幹園東鄰王逸少側聞有遠行不日將舉
棹愧我無杯酒贈言以為好贛州古雄郡水深山
亦峭先子所舊游間嘗語不肖風流清獻堂江圍
石固廟章貢利春遊崆峒宜晚眺南上鬱孤臺可
以觀衆妙明珠夜光來捲蓮山影倒高沙多寶苗
茉莉亦稍稍其俗尚支那拳勇與工巧治之不在

六洲先生遺集 卷五
猛宜以寬柔教先生既豪傑令子復跨竈萬一說
諸侯請以斯言告

送西銘遊長沙兼寄仲錫

遠送長沙去黃梅五月初南遊傷賈誼北學悔臯
魚浩蕩三湘色飄零尺素書不知收酒債醉尉意
何如

代人壽潘孝廉母

我居曲江東君居曲江右盈盈一水間神交亦已
久前年客閩中遭逢在杵臼浩蕩游潘江雲夢吞
八九時或質所疑應若洪鐘扣開府今大賢俊乂

日奔走重以禮為羅實藉持盤手爾廸賦陟岵星
言駕驪牡長揖前致辭當為北堂壽予亦附驥尾
歸寧歲次酉緬維太夫人出自高平某才子之令
妻孝廉之賢母鄰接二娥風夙聞寡鵠守卜宅近
膠庠種學為林藪十指具膏油黽勉成吾友天道
故好還苦節必有後滿眼見孫枝足徵坤德厚一
舞耄萊衣載歌將進酒安得劉更生譜諸聖善首

俞郡侯新築海塘詩

越之有鑑湖如人有胃腸東漢馬府君飲食不可
忘湯侯三江閘應宿名彰彰鑿山補地闕復見後

海塘東自人安山即馬鞍山西至於白洋綿亘四十里

壁立數仞強石骨而土月表裏成巨防恭逢俞使

君坐開清白堂建此不朽業媲美馬與湯回思乙

酉穉七月海若狂決裂丈五村三縣遭蟹荒蒸民

不粒食禹會無餘糧但聞一路哭目擊心慘傷誰

獻鄭俠圖誰發汲黯倉草艸塞患口歲歲醫故瘡

增卑與培薄勞費未可量不圖有今日苦海無波

揚新堤成偃月堅似百鍊鋼敝邑大門白亦在水

一方有備始無患謂西江橋備塘實賴公主張作詩告後

賢奕葉由舊章

西湖八首次韻蔡梅菴

岳王墓

出城遙望蕩陰墳少保神旗爛暮雲草木至今無

北向一統志岳武穆墓上古木枝皆南向識者謂忠義所感云風聲還似岳家

軍

紫雲洞

長挂西湖齒頰間每逢好景不逢閒何當一上栖

霞頰飽看玲瓏大小山元薩天錫紫雲洞詩大山小山石玲瓏

十錦塘

少年豪橫老風流一半尋詩半出遊未向瓜皮船

上醉游瓜皮西湖舫名心知獨負錦塘秋

范公祠

小范來朝大范祠
却民重立表忠碑
樂天老子句
留處一片孤山近
屬誰

小輞川

邵戒三別業

不為看花不樣船
園夫休減杖頭錢
前身孰是王

摩詰湖上虛誇小輞川

雷峰塔

翩翩遊屐策紅藤
直上浮圖第幾層
偶與文殊來

說法一雙錐子釘頑僧

北方呼塔為錐子

運木井

試憑寒甃折談僧
運木猶非最上乘
我見空中一樓閣
堯夫不似濟顛能

雲水堂

金粟花寒曉露凝
琉璃吹滅佛前燈
清齋三月無鹽味
雲水堂中雲水僧

分稻

并日愁艱食紛紛
刈早禾香含紅穞
稭霜倒翠婆娑乞米書
無益躬耕意若何
從來甘脫粟口腹不求多

六海先生遺集 卷五
豈昧田家苦其如我朶頤香
騰憐滯穗玉粒待新炊
一飯皆君賜三餐仗母慈
安能違所願索米向京師

恭擬

仁憲皇太后輓詩二首

戡亂從

先帝垂慈保

聖人恩深漢明德徽嗣宋宣仁
一佛歸靈驚重華
慟

紫宸遙聞

哀詔下過密入新春

奕葉為文母遐齡慰孝思
方隆天下養俄配地壇祠
長樂宮花黯慈恩塔影悲

園陵甘露日厭浥萬年枝

周雲際妹夫以香秬見寄奉答

斷腸歸妹憶同生忽見來書眼
倍明念我承歡惟菽水遠勞千里致香秬

越王廟

故國空遺廟春山繪霸圖
縱橫寃子貢貨殖陋陶朱
項羽幾吞漢錢鏐亦據吳
迴思嘗膽日何翅一

呼盧

送周菊山秉鐸龍泉

知君衣鉢受真傳江右風流相國賢
經學昔年鳴虎觀敷文此日向龍泉
漫稱吏隱耽山水好為兒郎樹硯田
只有道南吟社裏他時少箇飲中仙

送黃曉村內兄之官歙縣

好去金華古渡頭一琴一鶴一孤舟
栽花又見潘懷縣高詠誰如趙倚樓
坐對黃山真面目學尋朱子舊源流
更期努力行荒政莫說閒官是贅疣
從曉村乞新安方物三首

為覓黃山一樹松荒庭待種小盤龍
期君白髮相思日來看冰霜雪裏容

延州石液久無聞黠縣松烟政屬君
乞我龍文雙脊樣助添詩思結香雲

馬肝滑膩稱烏絲更少蛾眉一小池
龍尾溪頭煩鑿取結鄰好與話相思

嶺南遊戲集

富陽

富春江上野雲橫強撥離愁對晚晴
山似故人情袞袞潮憐初客勢平平
檣竿候羽隨風轉水驛吹

始覺路生自笑飄零舊書劍不辭萬里向孤征

桐廬

兩壁青山夾小江清流白石響淙淙入來佳境真
如畫支起孤篷即是牕吹沫游魚鱗可數浴溪沙
鷺影成雙今朝初飲桐廬水朝市山林意未降

釣臺

却望嚴陵舊釣磯高山大澤有光輝空祠落景無
人詣野鳥行雲傍客飛蓋代奇勳終寂寞高天列
宿尚依稀自慙役役勞塵事且待歸舟棹翠微

品水

前生不結趙州緣偶遇人間十九泉
飲水不知此水味愛山却少買山錢

陸羽品釣臺下水第十九

曲折江流枕上看故鄉無此好波瀾試嘗一勺蘭
谿水理會金華五百灘

舟中即事

渺渺雲沙一棹孤灘聲嗚咽樹模糊苦無顧陸丹
青手一寫長江風雨圖
岿容山色雨餘開水碓魚磯近客杯更待清秋晴
景好橙黃橘綠雁初來

牛山

歌枕時聆水面音輕舟不覺入山深何年却向滄
江臥此日聊為漁父吟黃鳥亂啼春樹裏紅泉細
瀉夕陽岑灘頭石徑稀人跡一片閒雲靜客心

草萍驛

江上羣峰插曉寒溪雲漠漠水潺潺瓜皮石路初
經雨竹攔肩輿正過山樵子巖花同野意鳥聲人
語共綿蠻今朝為證王維句一照冰灘破旅顏
見說江西景最奇此來真不負心期重巒疊嶂生
雲氣深菁叢林叫畫眉野性從來山水癖他鄉遮
莫路途岐相逢總是浮萍客行脚頭陀亦我師

過上饒

先尚書楓邱公
曾為上饒令

尚書公後苦零丁我亦昆孫困一經今日却從花
縣過清官舊坐對南屏
不覺離家路一千上饒江口月娟娟憑君照我思
鄉夢直到樟亭舊驛前

自玉山至弋陽

纔過西江幾驛樓溪深石峭景清幽名山勝地初
相引布襪青鞋此一遊懷玉峯前雲似褐弋陽城
下水如油他年若許投閒散欲向君王乞信州
自弋陽歷貴溪安仁至餘干

渺渺江程住復行好山過眼不知名短篷入夏愁
炎暑細雨迎梅喜晚晴不是飢驅為遠客何因并
日下連城笑看咫尺蕪溪水也作風波世上情

康山

拍笑亭前月正圓康郎湖上好停船饒州太守連
檣竝一夜更聲惱客眠

鄱陽晚眺

獨吟彭蠡口一望豫章城雲樹重重隔風波處處
生夕陽遲野渡舊雨漲江程為客皆愁思鄰船有
笛聲

鐵線岡

浩蕩鄱陽湖縹緲洪都府青翠近西山江濤初息
怒落日半邊黃風帆紛可數維舟鐵線岡沙洲新
過雨白鷺拳足立小鳥傍林舞密樹類夾葉亂石
如劈斧悠悠天涯客行吟何自苦聊記此山景他
時入畫譜

豐城阻風

人生憂患有何窮休學陽明拜北風

王文成豐城阻風詩北風

休嘆北船窮此
地曾經拜北風

詩句漫成清夢裏扁舟好在浪花

中踈簾掩映遙山翠老樹畸零舊葉紅正喜晚晴

還細雨却愁今夜酒樽空

舟中新暑

不信長江亦苦炎南風吹得汗如鹽人間酷暑無
逃避欲向廬山看水簾

吉水

熟梅南國雨落日贛江天野戍頻吹角孤村且住
船汨痕新漲後行色畏途前轉側懸燈下羈愁實
未眠

過贛灘

十八浮圖十八灘自錢塘至常山有浙江爭似贛

江寒船於恠石叢中過水自狂瀾倒處看行險敢
忘慈母訓浪遊方覺世途難眼前那得漁家樂細
雨斜風一釣竿

次贛州有懷羅二公子

羅慎調贛人也隨父任居豐潤縣

還鄉河上共徘徊還鄉河在豐潤余與慎調惜別處惶恐灘頭獨

自來離合正如章貢水相思還上鬱孤臺困知舊
學今何似羅整菴先生有戰藝名心半已灰安得

故人還故里草堂待爾掃塵埃

泊舟贛關候放遊清江寺

維舟不是待開關遊脚何緣到此間門外千家日

亭午林中一曲水潺湲風廊敗鼓無人打石鼎殘
香對佛閑如此清涼空舊隱白雲堆裡憶家山

南康野泊二絕句

晚泊芙蓉渡行歌水面亭數峰新過雨洗出佛頭
青

落景黃山額行雲濕翠微可憐溪上女赤腳負薪
歸

庾嶺口占

橫浦江邊殷殷雷雲封寺裏獨徘徊慙慙偏是黃
梅雨直送行人過嶺來

題南雄府長春菴井亭

五里山前溪水乾長春庵裏井華寒一杯正救行
人渴不待梅林濺齒酸

韶州端午是日夏至

好山滿眼碧玲瓏坐嘯行吟興不窮一日偶逢雙
節氣曲江正憶舊家風得魚便作銀絲膾為黍何
須翠箬筒最喜微涼新雨後自斟不落對殘虹

題飛來寺三亭子

歸猿洞口擁歸雲環珮琅璫不復聞一樹秋來紅
葉子依稀還見舊羅裙

問歸亭

四壁雲蘿著草菴長年風雨暗晴嵐山中自有銀
河水不待曹溪一勺甘

飛泉亭

人間憂患亂如麻誰肯溪山卧歲華說與亭前來
往客任從心地問丹砂

抱朴亭

三水對月有懷周五兄

萬里珠江客孤舟玉鏡臺時新嘗荔子鄉味憶楊
梅明月吹燈坐清風渡峽來故人三宿處矯首一
徘徊

五月十一日過廣州

陸賈城邊詠白蘋尉陀宮外月華新浮江不作探

珠客並海聊尋賣藥人暗暗潮頭隨旅泊星星漁
火聚蠻津移舟更近沉香浦去看羅浮六月春

野宿

野宿知何許空涼坐夜分水天一色魚鳥客同
羣潮汐猶通海羅浮尚隔雲江塘吹畫角嗚咽不
堪聞

顏明一邀同幕府賓客遊西湖

天涯此日喜同遊漫說杭州與潁州

杭潁惠三州皆有西湖

風景正如明聖水榮光時出御書樓花驄暫駐
垂楊岸画舫徐經點翠洲既醉不妨歸暮雨清涼

一似五湖秋

昌平俞把總將歸薊門索贈一言走筆以
應俞自言曾識先君子云

縹緲珠江貢物秋送君正在合江樓征蠻開府原
同事與我先公亦舊游南國夏雲隨畫舫西山曉
月渡蘆溝奚囊帶得迴文錦歸興怱怱為莫愁

客中贈李道升

寂寞南來識李蟠舊游如夢喜同論先人遊宦俱
燕趙後輩相逢亦弟昆玉石一枰消客晝琴書萬
里託侯門他年若向山陰道過我蕭條壯幹園

南食詩

味道愧朶頤南游徒口福肥甘豈不佳畏生髀裏
肉萬里為荔枝色香固所欲龍眼如智珠諫果亦
忠告檳榔味生澁入口苦荼毒圓顛越王頭柳劄子
漿醞醺醖楊梅憶故鄉番槎歎殊俗人面浪得名
雞頭不足錄我来適長夏橙橘猶未熟花蛤配鹽
豉珠螺過糜粥苦瓜既清涼甕菜復嫩綠觀鱉懷
莢弘鯿碧試蟹笑陶穀所恨鮓骨多那得鱉裙六

老伏伏翼化蜜丁魁蛤風鰻雄水族白鱓純舊聞江

珧柱意中殊不足往者畏河豚而今輕海目偶記

退之詩南食吾當續詩罷步中庭明月羅浮麓

與林元瀚李筠亭姚梅菴李道升小飲

好雨消炎暑厄言遠俗塵紅雲會裏客嶺南人釀金食荔子

謂之紅雲會青眼坐中人南食憐絲蛤東歸憶錦萼他

鄉須痛飲清漏莫嫌頻

登合江樓

合江樓下水淒淒似我歸心西復東渡口舊傳犀

角帶波心初颭石鯨風環山亂點芙蓉翠密樹斜

穿荔子紅悵望六如亭際草六如亭在豐湖上東坡妾朝雲葬此至

今歌扇揜芳叢

曲江

斗覺西風緊孤舟帶曲江密雲籠浦淑零雨入篷

窓歸路迎秋近愁城待酒降誰憐萬里客空下嶺

頭瀧

過嶺謁始興文獻公祠

曲江元鼻祖東海亦名流明南安守張弼有惠政郡人以弼配享文獻

不到雙祠下幾虛萬里遊閒雲生古檜歸路遶清

秋更待梅花發題詩徧嶺頭

次王文成公韻寄題通天巖二首

通天巖下有天梯萬丈青冥險莫躋絕境也知人

罕到此生直苦舊來迷九江秋色重重遠百粵雲
山故故低坐向山頭看海日五更初起聽鳴雞
鬱孤臺畔報秋聲十八灘頭月正明一片洞雲封
大古半空雞犬有餘清鑿山新建文章在射斗豐
城劍氣橫他日飛騰來絕頂狂呼仙侶醉瑤觥

客途次立表韻

汝自長沙至吾從嶺外歸今朝鴻與雁會作一行
飛

常山道中

黃篾船頭黃葉風輕颿快檝下江東青山滿眼迎
歸路不似羅浮瘴霧中

巖子陵祠

白水龍興日雲臺起壯圖不知天子貴依舊一狂
奴大隱心如此山中德不孤遙遙千載後還見客
星無

玄英唐處士臯羽宋遺民配食皆無忝

祠以方干
謝翱配

孤芳必有鄰餘波堪洗俗歸路欲迷津一詠滄江
上回頭愧古人

六湖先生遺集卷之五

六湖先生遺集卷之六

蕭山

張文瑞

雲表一
字孤雲 著

歸厚莊稿

蔡椒園生日



龍池張綺席甲第啟金鋪座挹西山色籌添北海
圖陽平標世學仲默藹醇儒品埒荀鳴鶴詩如鄭
鷓鴣清脩兼內美好爵應中孚雛鳳飛丹掖孫枝
長碧梧辨絃教泚女搔癢倩麻姑實有康寧福忻
看宴樂需同人皆宿德嘉會劇歡娛紅雪融香椀
榭花養玉壺新聲歌錄續春酒醉屠蘇今夜弧星

見光輝滿鏡湖

偕豐城楊匡谷至湘湖厲市湖看風水紀

事

我昔守師說不屑談青鳥余師來柘三先生不信青鳥家言師死

豈倍之出遊聊自娛放船湘湖上連山如貫珠遠

矚山體勢近眎土肌膚祖宗息穴葬先尚書忤寧濠時慮濠發

塚故連山先塋立虛壙者三形家以虛壙為息穴子孫立錐無徘徊四正

地先塋號為四正地言尋厲市湖先公弔鶴處墓草猶未

枯脈從玄武入砂是青龍鋪東蜀山名橫玉枕巽水

來盤紆右峯文筆拱黃竹山號文筆峯左峰天馬趨眠垣

取中局乘金若合符故人劉卓如相此地氣舒為

言先公後當出君子儒今復得楊子為我野踟躕

外作一羅城內開兩溝渠移樹表蟬翼附土作蝦

鬚湖光湛明鏡山色佳有餘逝者既爽塏生者亦

恬愉墓旁營小築來守先公廬手植松與栢幸弗

遭庸虞不知千載後佳城復何如

送金素亭廣文之安吉

手捧除書喜氣新蘇湖衣鉢宰官身靜存自得仁

山學游衍何妨霽水春五七言吟賈島佛十三行

寫洛川神欲銷別後相思案好把梅花寄故人

輓蔡梅菴

十年汐社共論文絮酒今朝痛哭君一點靈光行

碧落

魏文靖臨終詩一點靈光直上行

滿前洋溢出塵氛

羅近谿臨終弟

子環侍請教曰滿前前身想是許玄度

梁蕭啓是許詢後身

後世方知揚子雲試向稠人中寓目更無一鶴在

雞羣

雨中漫興

十日半月不肯晴天公無乃非人情新陽乍見當
亭午好鳥初來未轉聲可惜桃花遭雨水也知楊
柳弄清明等閒莫問春深淺且覓心知共解醒

江寺

一日春晴抵萬金出門游戲散塵襟路從玄度園
邊取詩就文通寺裏吟入社何妨開酒禁聞鐘不
覺會初心眼前欲漲桃花水試向篙師問淺深

從禹陵至南鎮薄暮而歸

金堂玉室杳何從松檜陰陰萬壑風日月雙珪藏
大禹山川餘氣霸重瞳香鑪峯上輕烟碧窈石亭
前落照紅蕩槩歸來餘興在還將杯酒付詩筒

蘭亭懷古

會稽佳山水天下本無心杳靄雲壑中蘭渚清且

幽越王樹國香茲亭歷千秋吁怪王右軍何以愛
一邱清言滿江左不解蒼生憂臨池亦太古蠶紙
蟠龍蚪昭陵失玉匣真帖難再求空然垂八法一
藝何足游君子戒小道所學皆孔周詎不樂巖藪
未忍空白頭遊目感陳迹脩竹搖春愁高歌冬青
樹曲水鳴咽流古人不可作延佇思悠悠

賀段方伯公子舉孝廉

代趙明府作

清淑中州氣由來毓大賢本朝承景運舊德作孚
先濟美膺天眷來旬自日邊湖山開祭戟江國被
釣甄政化三吳洽謳歌百越連官常推列岳家學

表伊川世胄登瀛日文星聚井壘蒞珠多士冠衣
鉢相君傳京洛瞻高選詞林必妙年鹿鳴行省讌
鷓畫孝廉船秀奪昭容錦名題令史擅澤宮花似
譜才子筆如椽賈誼逢前席相如近御筵羽儀看
鳳翥甲第慶蟬聯喜溢東西浙光流左右瀍義方
成善教長共佐堯天

洋粉團

紛紛嫩綠轉輕紅三變黃梅細雨中想像河南程
伯子一團和氣在春風

春耕

十畝饒田趁雨犁忻然赤脚下塗泥不知擾攘九
衢裏何似蕭間一稻畦午歇柳陰聽鳥語晚歸山
徑跡牛蹏幾回抱鄰吟梁父等箇人來指路迷
自把犁鋤手足便青蓑箬笠飯烏犍言尋荷擔僧
前路來破雲門寺後田三個黃梅行好雨六湖春
水足豐年早知畎畝堪終老何苦紛紛乞世憐

屬市湖即事

小築南湖僅數椽經營不乞買山錢雲峰四面遙
相拱嘉樹千章近接聯野徑暗開深草裏釣磯宜
著淺沙邊心知懶惰成吾拙只好躬耕墓下田

一片湖光繞樹明數間茅屋傍隄城槎頭小泊沽
村酒野老相逢話豆棚十畝閒田堪粒食三旬好
雨足春耕邇來儘有無窮樂澹泊甯懷何所營

楊梅二絕句

葉似支離樹石楠山枝爭似水團甘荔枝以山枝為絕楊梅以

水團為妙蕭山風物都堪愛一味楊梅壓嶺南

顏如木李麝香紅麝香紅李之最美者哈密葡萄臭味同若

把楊梅比妃子風流正在肉肥中

即事口占

西陵渡口雨如麻一抹吳山隱浪花居士意中魚

撥刺行人路上蟹爬沙

螳知將雨移新穴鵲識無風守舊巢
兩問先生都不應坐遲山月上城凹

食瓜

步隲方謀老圃鄴侯不詠黃臺正思剖之而食
從何處飛來吳步隲貧居永興種瓜為業

夏日烈如趙盾秋瓜美似東陵焉能繫而不食何
妨饅以名亭饅瓜亭宋呂文穆公事

郝公孫詩 并序

明季邑令郝愈卒於官遭亂旅櫬未歸今其後

人走萬里求骸骨邑中父老罕有識其處者予

哀而賦之

百年誰識故侯墳萬里來尋苦殺君見說前朝渾
是夢可憐荒塚亂如雲烏啼落日魂何在足蘭空
山哭不聞試望孝陵衰草裏秋來黃葉落紛紛

夏日漫成

終日垂簾隔市塵石牀藤枕竹夫人吟殘梅子三
旬雨睡過荷花六月春頗有茶瓜消酷暑絕無鷺
鴨惱比鄰更營別墅南湖上我亦清狂賀季真

贈紀緘三孝廉

征車多壯去公子獨南遊訪我西陵渡同登近水

樓古棠司李樹緘三尊公舊為杭州推官今雨孝廉舟舊好懷

同學離絃撥暗愁字寅猶處約井子演子翹亦居憂

陳君儀尺素沉魚腹梅花隔隴頭黃河行欲凍紅葉

去吟秋漢栢唐碑下還應憶故侯文安縣有漢栢唐顏魯公碑先

公初宰是邑

歸厚莊偶成

葉落霜紅十月初草堂新就小村墟等閒南浦烟

光裏獨立橋頭看打魚

歸厚莊即事

年來剩得草堂貧小築城南地頗宜湖亦有名鄰

賀監村因不俗近西施叔魚橋下堪垂釣文筆峰

前好賦詩一日三公吾不換終焉畊稼復奚疑

寒雨蕭蕭歲欲昏端居無事掩衡門詩將窮我工

何益賤不求人品自尊歌詠最憐晞髮集出遊除

是浣紗村此生不作榮華想淡泊何妨咬菜根

天植見過得曉村書有懷北地舊游

雨雪蕭蕭逼歲昏客來剝啄叩吾門忽忽不暇寒

暄語先問山陰黃曉村

南州徐孺吾師表江夏黃童亦友于見說安仁為

小縣

胡沛施補永豐令

何如張蔚尚窮居

五言長憶羅昭諫八法猶憐井大春說到田盤山下路舊交林下已無人

往時文酒追歡地故客重經感舊非惟有還鄉河上水洗君塵土勸君歸

寄浦口白衣庵僧寄山

昔年歸妹過環滁曾向高人宿草廬記得金陵江對岸晚山如畫雪消初

過樂邱魏尚書墓下作

西山迤邐走如龍今日來尋馬鬣封百里湘湖君

子澤

魏公力復湘湖水利

千秋偃蓋大夫松心儀冠履崇先

正擬卜菟裘作附庸况是家山山對面終朝相對翠芙蓉

奠孝閔黃冝人

廢圃除荒草平洋得湧泉

山足為湧泉穴

試看朱雀舞記

取白羊眠

宋鄭昭先祖葬時一人指點曰此貴穴也

此日分

連理他時共九泉西山多爽氣終古對嬋娟

歸厚莊

忽聽黃鸝弄翅頻手持杯酒過青春不為世上風波客且作田間嬾散人種樹正須微雨後釣魚近

在小江濱何當喚起秦公緒麗句亭邊話夙因

北游藁

趙北口

頗似江南景蕪葭水一方鱸魚烹素練雪酒倒寒
香信美非吾土重來亦故鄉相看趙北口猶有舊
甘棠

上宮詹汪荇洲先生

江夏無雙地中朝第一流太函家學顯天祿秘書
留文起東西浙名齊六一歐榮光分玉燭相度卜
金甌多士懷明鑒先人荷闡幽龍門天際遠感激

願相投

上少保桐城宗伯

禮樂光昌地重華命伯夷淵源橫浦學丰度曲江
儀晝日榮三接廉隅表四維從容籌國是奕葉掌
王綵淑問存欽恤皇華廣詢諮使齊魯却幣如魯
亦陳詩列岳懷清德東郊頌保釐中朝占輔相西
序攝丞疑聖眷誠如此名言允在茲泰交歌喜起
蒙養傳岐嶷是處栽桃李非材愧本支上林如可
借及此正芳時

覽鏡呈祖豫章

六湖先生遺集 卷六 九
流年非故我清鏡亦塵埃
瑣瑣傷顏厚星星感髮
新丞乎何負汝壯也不如人
合向廬山下高人狎
隱淪

秋日京邸漫興

夜合樹頭花盡晚香堂北
清秋詩戒乘除口過酒
兵攻打愁城

一鹿車還客拜兩鷓鴣酒
借人書胸次依然故我鏡
中不似當初

天上白衣蒼狗人間冠冕
泥塗試問乘軒野鶴何
如傍母鳧雛

金盡貂裘亦敝秋來酒盞
常空子好遊乎枵腹吾
將仕矣熱中

暑退渾如寇去酒醒恰好
詩成不趁槐花覓舉却
從桐葉題名

今雨重來日下十霜夢寐
遼西懶復讀書刺股悔
不躬耕噬臍

兩句阿房宮賦一曲范履
霜琴老兵也有鑒識公
等孰是知音

夜壁蛩聲唧唧曉牕街鼓
隆隆長此徘徊岐路不
如歸謁山中

竟日

竟日成癡坐隨時換袂衫懷歸腸九轉避俗口三
緘自笑侏儒短誰憐女手搵空慙梁上燕子母語
喃喃

過薊州謁先大夫祠堂

昔年隨宦地此日再經行襍被投荒店輕車入
城新官乍相識遺老尚多情痛哭先祠下飄飄忝
所生

重登薊州觀音閣

飛閣凌空外重來散客襟行雲遮落日晚吹度寒

砧極目窮途恨慈悲大士心欄前諸嶺秀不改舊
知音

送陸傲巖視學廣西

翼軫離明地文章太史公灑江澄藻鑑桂嶺待春
風教思通南極雄才入彀中懸知清節著早已簡
宸聰

客牕

客窓情味淡於僧只有寒蟲共語冰耘老畫叉因
我設公孫撲滿咲何曾病驅鹽坂垂頭驥眼勸青
霄繫臂鷹何日春風還舊隱繁花如錦酒如澗

南郊瑞雪與鹿溪太史同作得南字

夙駕傳清蹕乘輿正指南御鑪香冉冉瑞雪影氈
毳玉屑鋪三墀瑤花舞兩驂蒼穹昭鑒格廢物喻
包含節屈葭灰候祥徵黍稷甘陶匏輝素質柴燎
濕烟嵐至德雲門奏恭陪太史談
皇恩均浩蕩嵩祝聽呼三

至日

散盡黃金心不灰南遊百粵北燕臺正愁水落石
將出且喜陽生春又來雪意公然欺旅鬢詩情莞
爾笑寒梅今朝

玉輅南郊後定有新恩被九垓

送姚使君梓嵐赴會稽郡

君侯官屬大司農冰蘖賢聲徹九重五馬雙轡新
簡命千巖萬壑古提封居民圍繞蓬萊閣候吏歡
迎秦望峰從此吾州應得歲會看惠澤下車濃

送孫仙巖守衡州兼寄俞敬哉司馬

十年投分喜相親五馬怱怱去問津衡岳雲霞迎
露冕瀟湘煙水待陽春文章不讓庾開府政事還
如召信臣寄語江州白司馬好將高誼協同寅

送李東厓守建昌

十年美政冠諸州喜見車前引八騶北海才名今
第一西江風物古無咎行春陌上隨膏雨坐照臺
端豁遠眸千里生民勞撫字徵黃計日卜金甌

題狄梁公褫張昌宗集翠裘圖

我思狄梁公氣與道義配方其事女主大智若愚
昧一博千金裘正色壓鼠輩爾乃摹其神凜凜有
風凜青為大將軍不敢附後代此事蓋有之此圖
不可廢

賀姚蕪南入贅桐城司農宅

臺閣和鳴雙鳳皇冰清玉潤兩相當嘉平時節成

嘉禮國士英華配國香定有名言矜博議漫將才
語炫新妝與君先道登科喜小雅詩中第一章

坐食呈鹿溪太史

坐食京華不出門一燈無語對黃昏明妃只隔若
王面韓信難忘漂母恩豈但窮途傷歲暮更憐久
客廢冬溫春風欲動歸期近且向於陵學灌園

元夜宿富莊驛

周流四海一詩瓢三宿河間去國遙賣劍買牛歸
舊隱典裘沽酒過今宵荒村明月愁相照野店孤
燈手自挑尚憶十年前此夕荷花池館在保定府正春

韶

次韻徐祖詒贈別途中却寄

北學相逢一月多，南轅無那客愁何。
不看燕市新燈火，歸去山陰舊薜蘿。
石鼓門前歌爛熳，棠梨樹下影婆娑。
那能得似君年少，手煥春闈待決科。

望岱

去國懷燕邸，歸途見岱宗。
巖巖儒者象，兀兀丈人峰。
積雪明山磴，春風帶曉鐘。
何當借雙屐，徧踏翠芙蓉。

贈同行江岷山

結駟南來喜得朋，羨君風雅最多情。
相看岱色千峰秀，共指齊烟九點明。
今日塵埃逢一顧，他年車笠記同盟。
無雙亭下須分手，一路春帆聽曉鶯。
纔從傾蓋亭邊去，還向淮陰市上行。
馮翊風沙遙北轍，長江煙雨近南京。
詩於燕子磯吟就，賦似天孫錦織成。
我亦茅山張伯雨，浣花灘裏此歸耕。
二月二日過京口從丹徒移舟二首
歷歷春山興不孤，布帆無恙下東吳。
絕無燕市風塵障，坐看長江烟雨圖。
焦山渡口少淹留，又向吳儂買小舟。
見說春風能

解恨教人長倚牡丹頭

六湖先生遺集卷之六

男 學懋恭謄寫

後學毛元會頓首填諱



蕭山王憲文刊

乾隆初官青州同知

